



Špirić: Pogodnosti ovog velikog međunarodnog projekta

Romi više dali BiH nego što im je ona uzvratila

Predsjedavajući Vijeća ministara BiH uskoro će potpisati deklaraciju o pristupanju programu "Dekada Roma"...

29.05.2008. 17:42

Predsjedavajući Vijeća ministara BiH Nikola Špirić izjavio je danas u Sarajevu da će Vijeće ministara u junu usvojiti akcijske planove za rješavanje problema romske zajednice, nakon čega će BiH potpisati deklaraciju o pristupanju programu Dekade socijalne inkluzije Roma 2005 - 2015 (Dekada Roma).

Špirić je nakon sastanka sa članicom grupe "Vaja con Dios" Dani Klein, koja je pobornik zaštite prava Roma u Evropi, kazao novinarima da će priključivanje "Dekadi Roma" omogućiti BiH da koristi pogodnosti ovog velikog međunarodnog projekta, te da pomogne Romima u BiH.

Današnjem sastanku prisustvovali su i ministar za ljudska prava i izbjeglice BiH Safet Halilović, članice Evropskog parlamenta Els de Groen i Ana Ibrišagić, te predstavnik inicijative "Dekada Roma" iz Instituta otvoreno društvo Željko Jovanović i koordinator Vijeća Roma BiH Dervo Sejdić.

Špirić je podsjetio da je BiH 2003. godine usvojila Zakon o zaštiti prava nacionalnih manjina i da je usvojena nacionalna strategija za romsku zajednicu u BiH, te je obećao da će se u planiranju budžeta za narednu godinu posvetiti više pažnje problemima pripadnika ove najbrojnije nacionalne manjine u BiH.

- Mislim da su Romi mnogo više dali BiH nego što im je ona uzvratila, dodao je Špirić, naglasivši da je zadovoljan što će i BiH postati dio programa "Dekada Roma".

Članica grupe "Vaya con Dios" Dani Klein kazala je da se tokom putovanja uvjerila da su u svim zemljama, u kojima žive, Romi diskriminirani.

Naglasila je da Romi trebaju biti jednako tretirani kao pripadnici ostalih naroda, ocijenivši da ona kao muzičarka ne bi postigla veliki uspjeh da u njenim pjesmama nije bilo romske muzike.

Klein je kazala da se prilikom posjete jednom romskom naselju uvjerila da Romi u BiH žive u izuzetno teškim uvjetima.

Članica Evropskog parlamenta Els de Groen istaknula je da je za BiH prioritet usvajanje akcionog plana za rješavanje problema romske zajednice, naglasivši da potpisivanjem Sporazuma o stabilizaciji i pridruživanju (SAA) sa Evropskom unijom (EU) BiH preuzima određene odgovornosti prema pripadnicima ove nacije.

Predstavnik inicijative "Dekada Roma" iz Instituta otvoreno društvo Željko Jovanović kazao je da je romska nacionalna manjina u BiH najugroženija, te da će priključenje "Dekadi Roma" pomoći BiH na njenom putu ka evropskim integracijama.